



# झजलपा वाऱ्वा

JWOJALAPA WEEKLY

दैं ७ ल्या: २९ (पूर्णडक १३१) ने. सं. ११३७ चिल्लाख पारु आइतवा: २०७३ फागुण १५ गते आइतवार (Feb- 26, 2017)

मू द १- पृष्ठ ६

## चुनावया सवाल्य् सत्तापक्षनिसें प्रतिपक्ष तकं अलमल स्थानीय तहया सवाल्य् स्वनिगलय् हे अन्यौलता

ज्वजलपा वा:पौ/

स्थानीय तहया चुनाव यायेगु धका: सहमति याना घोषणा या:गु प्रमुख दल दुने हे अलमल अप्वया व:गु दु। स्थानीय तहया चुनावया सवाल्य् दक्ले अप्व: स: तया वयाचंगु एमाले दुने हे बरिष्ठ नेतातय्सं चुनावया सवाल्य् आशंका यानाह:गु दु।

नेकपा एमालेया बरिष्ठ नेता लिसें पूर्व प्रधानमन्त्री माधवकुमार नेपाल वैशाख ३१ या स्थानीय तहया चुनाव जुइगु खंय् आशङ्का प्वकादिगु दु। पर्वत सदरमुकाम कुश्माबजारय् म्हिग: जुगु कार्यकर्ता नापलायेगु ज्याभवलय नेता नेपाल सत्ताया नेतृत्व या:गु दल निर्वाचनप्रति गम्भीर मजुगु कारणं चुनाव जुइ हे धइगु खंय् दुक्क जुइगु वातावरण मदुगु खं धयादिगु ख:। वयकलं संविधान संशोधन प्रस्ताव देय्या हित मदुगु बिचा: प्वकादिसैं एमाले गुरुगु नं हालतय् उकिया पक्षय् मदुगु खं तयादिगु ख:। उगु हे कथं नेपाली कांग्रेस दुने व माओवादी केन्द्रया दुने नं स्थानीय तहया चुनाव याये न्हय: आदिवासी जनजातिनिसें मधेसीया माग सम्बोधन यायेमा:गु खंय् व: बियाह:गु दु। मधेसी व जनजातिया मागयात सम्बोधन मयासे चुनावय् वन धा:सा चुनाव याये मफइगु खं स्वयं सत्तापक्षया नेतातय्सं धयाह:गु दु।

वैशाख ३१ गते स्थानीय तहया चुनाव यायेगु धयाचंगु जूसां नं स्वनिगलय् हे स्थानीय तहया संरचनाया सवाल्य् अन्यौलता ब्वलना व:गु दु। शंखरापुर नगरपालिकाया स्थानीयवासीत रत्नपार्कय् रिले अनसन हे च्वनाचंगु दुसा किपू नगरपालिकाय् दुध्याकल धका: दक्षिणकाली नगरपालिकाया स्थानीयवासीत नं आन्दोलित जुया व:गु दु। स्वनिगलय् जक ६० हजार जनसंख्याया मापडण्ड त:गु तर मेमेगु जिल्लाय् धा:सा ३० हजार कायम या:गु अवस्थाय् स्वनिगलय् नं ३० हजार जनसंख्या हे कायम यायेमा: धका: माग याना अथे शंखरापुर नगरपालिका व दक्षिणकाली नगरपालिकाया स्थानीयवासीत आन्दोलनत जुयाचंगु ख:। अथे हे न्हूगु संरचनाया विषयया तकया येँ महानगरपालिका व यल उपमहानगरपालिकाया सवाल्य् नं अन्यौलता ब्वलगु दु।

### संघीय गठबन्धनं सशक्त आन्दोलन याइगु



सरकारं स्थानीय तहया चुनाव यायेगु धका: घोषणा या:गु विरुद्ध सशक्त आन्दोलन यायेगु नितिं संघीय गठबन्धनं कार्यदल दयेकूगु दु। आन्दोलनया ज्याभूव: तयार यायेगु नितिं दयेकूगु कार्यदलया कजि कथं संघीय समाजवादी फोरम नेपालया सह संयोजक राजेन्द्र श्रेष्ठयात ल्य:गु दु।

अथे हे कार्यदलया दुजलय् बृपेशचन्द्र लाल, केशव भ्मा, रामनरेश राय, डा. ओम गुरुङ, डा. विजय सैजु, दुर्गा राई, दलमर्दन कामी व प्रेमबहादुर खाती च्वनादीगु दु। उगु कार्यदलं छवा:या दुने आन्दोलनया ज्याभूव: तयार याइ धा:गु दु।

अथे हे संघीय गठबन्धनय् दुध्या:गु संयुक्त लोकतान्त्रिक मधेसी मोर्चाया आन्दोलनयात समर्थन यायेगु अले नागरिक समाजनिसें थीथी राजनीतिक दललिसे नं आन्दोलनया बारे सहलह व्याका वनेगु धका: संघीय गठबन्धनं तयार या:गु दु।

## तिर्थ यात्राको सूचना

यही आउँदो फागुण २१ गते शनिवार आजु भेहिकल प्रा.लि. लोकतान्त्रिक चोक, नयाँबजार द्वारा लेले मनकामना र पाथीभरा दर्शन गर्न जाने तिर्थयात्राको आयोजना गरिएको छ। उक्त तिर्थयात्रामा जान चाहनु हुने महानुभावहरुले यही फागुण १९ गतेसम्म टिकट बुकिंग गरि आफ्नो सीट सुरक्षित गर्नुहोला।

टिकट दर : रु. ९००/- (रुपैया नौसय मात्र)

हाम्रो सेवाहरु :

—समय बजी

— खाना



आजु भेहिकल प्रा.लि.

लोकतान्त्रिक चोक, नयाँबजार कीर्तिपुर ९८६१९३५९०१, ९८४१४९८९९५



# ज्वजलपा वा:पौ

सल्लाहकार  
श्रीकृष्ण महर्जन  
प्रकाशक:

नजरराम महर्जन  
सम्पादक

श्रीकृष्ण तण्डुकार  
ले-आउट:

ज्वजलपा डेस्कटप  
संवाददाता

भरत महर्जन, निरजमान सिंह  
थाकू

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४९४०९०७७

ई-मेल : jwojalapaweb@gmail.com

## सम्पादकिय

## चुनाव व स्थानीय तह

सरकारं वैशाख ३१ गते स्थानीय तहया चुनाव यायेगु धका: घोषणा या:गु नाप नापं चुनावप्रति आशंका नं ब्वलना व:गु दु । चुनाव यायेगु धका: घोषणा या:गु दुसा स्थानीय तहया विषययात कया अन्यौलतायात स्पष्ट याये फयाच्वंगु मदु ।

बालानन्द पौडेलया नेतृत्वय् गठन या:गु गाउँपालिका, नगरपालिका, विशेष क्षेत्र, स्वायत्त क्षेत्र व संरक्षित क्षेत्रया सिमा व संख्या निर्धारण समितिया प्रतिवेदन अपुरो व अधूरो ख: धका: सकल दलया नेतातय्सं स्वीकार या:गु विषय ख: । अले वहे आयोगया प्रतिवेदनयात कया भिंकेमा: धका: स्वयं सत्तापक्षया नेतातय्सं धयाच्वंगु अवस्था दुसा प्रमुख प्रतिपक्षं धा:सा प्रतिवेदन कथं हे चुनाव यायेमा: धयाच्वंगु दु । उखे जनस्तरपाखें उगु प्रतिवेदनयात कया विरोध याना आन्दोलन तकं यानाच्वंगु दु ।

स्वनिगलय् हे सक्क व दक्षिणकालिया स्थानीयवासीत आन्दोलनय् क्वहां वयाच्वंगु दु । उलि जक मखु यें, यलनिसें किपू नगरपालिकाय् तकं आ: गुगु कथंया संरचना दयेकेगु ज्या जूगु ख: धका: स्थानीय राजनीतिक कार्यकर्तात तकं अन्यौल जुयाच्वंगु दु । थुगु कथं अन्यौलताया दथुइ चुनाव यायेगु धयाच्वंगु धइगु चुनावया सवालय् आशंका भन भन अख्यया व:गु दु । प्रमुख राजनीतिक दलया नेतातय्सं थ:पनिगु हे दलया कार्यकर्तायात बांलाक्क थुइके मफयाच्वंगु थ्व इलय् जनतातय्सं गुबले थुइके फइगु ख: धका: न्हयस: ब्वलनीगु स्वभाविक हे ख: ।

## गजल शौरभ शाक्यया

### गजल-२१

जिन्दगी गनं दिनाच्वथें, छ मव: बलय् थ:गु हे किचं लिनाच्वथें, छ मव:बलय् । सुपाँय् मुतुमुना, छंगु किपा:लुइकाच्वना तापाक छ नगूथें थिनाच्वथें, छ मव:बलय् । बजारय् हुलमुलय्, मिखां छ मालाच्वन जिला लँस ला जुया पिनाच्वथें, छ मव:बलय् । जित:छुहे छुमा:मव्यूसैं, छ वन गन गन थ्व मन छथाय् हे दिनाच्वथें, छ मव:बलय् । बाकी दुनि आस अझ, थ्व नुगया कुककामय् छंगु मतिनाया खिपं चिनाच्वथें, छ मव:बलय् ।



## समस्याया निकास चुनाव जक मखु



### -सानुराजा शाक्य

राष्ट्रपति धइगु जुजुया विकल्प जक ख:ला ? संवैधानिक राजतन्त्रय् राजाया गुगु भूमिका ख: गणतन्त्र नेपालय् नं राष्ट्रपतिया भूमिका धइगु म्हिग: जुजुं छु यानावन वहे ख:ला ? राष्ट्रपति दलया नेतातय्त स:ता माघ ७ दुने स्वंगू तहया नं चुनाव याकेत सरकारयात दबाव बिल धइगु समाचार व:गु दु । संविधानया संरक्षक राष्ट्रपति जूगुलिं चुनाव याका: संविधान कार्यान्वयन याकेगु राष्ट्रपतिया दायित्व धका: थुइकेफु अथे ख:सा संविधानयात कया: देय्या: त:धंगु हिस्सा असन्तुष्ट जुयाच्वंगु स्वीकार जुइ धुंका: असन्तुष्ट जनताप्रति राष्ट्रपतिया दायित्व छु ले न्हयस: स्वभाविक रुपं ब्वलनी । तर राष्ट्रपतिया ध्यान संविधानयात कया: असन्तुष्ट जूपिं जनसमुदाययात नं सन्तुष्ट यायेमाल धका: धायेगु स्वयां नं एमालेया केपी ओली भ्वाइस कार्यान्वयन यायेगुपाखे जक वन । संविधान जारी याना नं कार्यान्वयनय् हये मफयाच्वंगु एमाले कांग्रेस व माओवादीयात चुनाव जुल धा:सा संविधान नं कार्यान्वयन जुल धका: धाये छिनी धका: चुनावया खं ल्हानाच्वंगुलिइ शंका मदु तर राष्ट्रपति नं स्थानीय तहया चुनावया मिति घोषणा यायेमाल धका: प्रधानमन्त्री पुष्पकमल दाहालयात एमालेया नेतात साक्षी तया संविधान जारी या:पिं दलया शीर्ष नेतातय्त स:ता दबाव बिल । चुनावया मिति घोषणा यायेत प्रधानमन्त्री पुष्पकमल दाहालया तत:धंगु दबाव व:गु खनेदत ।

संविधानयात कया: जूगु आन्दोलन व उकिं याना: भण्डै खीमं जनतां बिउगु सहादतयात वेवास्ता याना: चुनावया रटान जक राष्ट्रपति छये बियाच्वंगु ? छु राष्ट्रपति एमालेया पूर्व नेता जूगुलिं एमालें छु छु धाल वहे जक राष्ट्रपतिया भ्वाइस ख:सा राष्ट्रपतिया नं विरोध छाय् याना महयेगु ? राष्ट्रपतिया जिम्मेवारी फुक्क जनताया भावनायात क:घाना वनेमा: धइगु ख:सा संविधानयात कया: आन्दोलित जूपिं जनताया भावनायात नं याकनं संवेधन याना: चुनावया वातावरण दयेकी धका: सरकार व प्रमुख दलतय्त राष्ट्रपति छाय् न्वाये मफुगु ? थुकथंया न्हयस:त नं जनताया दथुइ थने मा:गु अवस्था पिदंगु दु ।

नेपा:या राष्ट्रपति धाइमह उद्घाटन मन्त्री, विमोचनमन्त्री विकल्पया व्यक्ति धा:सां पाइमखु । राष्ट्रपतिया ज्या दकलय् न्हापां जुजुपिंथें मठमन्दिरय् सरकार प्रमुख उपस्थित जुइमा:गु थासय् उपस्थित जुइगु वधुंका: उद्घाटन विमोचन सभा समारोहय् उपस्थित जुइगु व अले त्यं दुगु ई दलया नेतातय्त स:ता भिं मनूथें च्वंक उपदेश बिइगु भूमिकाय् सिमित दु । थुकथं हे छु

ई न्हय: राष्ट्रपति स्थानीय तहया चुनावया मिति घोषणा यायेमाल धका: संसदया मुख्य दलया मूमू नेतातय्त तया: प्रधानमन्त्री पुष्पकमल दाहालयात स्थानीय तहया चुनावया मिति घोषणा यायेत दबाव बिउगु खनेदत ।

इलय् ब्वलय् राष्ट्रपति संसदया प्रमुख दलया शीर्ष नेतातय्त स:ता राजनीतिक छलफल स्वयां निर्देशन बिइगु कथंया व्यवहार कयनेगु या: । राष्ट्रपतिया थ:गु हे स्वविवेकं स्वयां अमूक पार्टीया नेतातय् सल्लाहकथं प्रमुख दलया नेतातय्त स:ता दबाव बियेगु रणनीति ज्वनाच्वंगु । प्रमुख पार्टी सु सु धका: स्वयेगु ख:सा थौंकन्हे संसदय् दकलय् त:धंगु नेपाली कांग्रेस वधुंका: कांग्रेस, एमाओवादी, राप्रपा वधुंका: संघीय समाजवादी फोरम ख: ।तर राष्ट्रपति व प्रधानमन्त्री नं मुँज्याय् स:ति बलय् राप्रपा धुंका:या दकलय् त:धंगु दल संघीय समाजवादीयात मस:तूसे विजय गच्छेदार यात स:तेगु यानाच्वंगु दु । राष्ट्रपति वा प्रमुख दलया मुँज्याय् संघीय समाजवादी फोरमयात स:तल धा:सा चुनावया खं स्वयां नं संविधान संशोधनया थ:गु तर्क तइगु उकियात राष्ट्रपति लगायत प्रमुख दलतया नेतातसैं तार्किक ढंगं खण्डन याये मफइगु जूगुलिं विजय गच्छेदारयात स:ता मधेसी आदिवासी जनजातिलगायत जनताया सशक्त पार्टी कथं न्हय:ने वयाच्वंगु संघीय समाजवादीयात मस:तूगु ख: धइगु अ:पुक: हे सी दु ।

नागरीक समाज नं याकनं चुनाव घोषणा यायेमाल धका: गोष्ठी या:गु खनेदत । नागरीक समाज धका: ख्वा: कयं:पिं अमूक दलया भ्वाइस मेकर जुया: न्ववायेवं चुनाव जुइमखु धका: मस्युपिं बौद्धिक धका: धाइपिन्त छु धायेगु ? देसय् सशस्त्र युद्धया इलय् नं यक्क दल व बौद्धिक नागरीक समाजं शान्ति, शान्ति धका: थ:गु ख्वा: टेलिभिजनय् कयं वंगु ल्व:मंगु मदुनि । मात्र शान्ति शान्ति धका: जप यायेवं शान्ति वइमखु धइगु उबले नं प्रमाणित जुल । अमूक शान्तिया जप यायेगु स्वयां राजनीतिक समाधानया निती निकासया बारे उबलेया दलतय् दथुइ समझदारी जुइवंतिन सशस्त्र युद्धया अन्त जूगु ख: । उकिं आ: नं चुनाव चुनाव धका: चुनावया रटान याना: जक चुनाव जुइफइगु अवस्था मदु । चुनाव जुइगु वातावरण दुसा जक चुनावया सार्थकता दइ ।

संविधान संशोधनया मुद्दायात निष्कर्ष मथ्यंकूसे स्थानीय चुनावया मिति घोषणा यात धा:सा असन्तुष्ट मधेसी व आदिवासी जनजाति दलतसैं आन्दोलनया घोषणा यायेगु धका: स्पष्ट याये धुंकल । थुज्व:गु अवस्थाय् चुनावया मिति ला घोषणा जुइफु तर चुनाव नेपा:या पहाडी लागाय् जूसां तराई मधेसया समथर भूभागय् चुनाव याके फइगु संभावना मदु । सरकार व संविधान जारी या:पिं दलतय्त न्हापां पहाडी लागाय् चुनाव क्वचायेका अले सरकारया शक्ति फुक्क तराई मधेसय् केन्द्रीत याना जूसां चुनाव याके फइगु म्हगस खन जुइफु तर थुज्व:गु हर्कत नेपा:या अखण्डताया

विरुद्ध पुसा पियेगु जक जुइ । चुनाव प्राविधिक विषय जक ख: । चुनाव जुइवं हे नेपा:या वर्तमान राजनीतिक समस्या ज्यनी मखु । तर संविधान जारी या:गु दलया नेतातसैं चुनाव जुल धा:सा राजनीति सललल बा:वनी धका: कोरा कल्पना यानाच्वंगु दु । नेपा:या हे म्हिग:या अनुभव ल्व:मंका चुनाव हे सर्वपरी सत्य ख: धका: थुइकेगुसा पंचायतया इलय् नं चुनाव जूगु हे ख:, छयालीस साल धुंका: नं संसद व स्थानीय निकायया चुनाव मजगु मखु तर नेपा:या थीथी समस्या मज्यं, उकिया प्रतिक्या स्वरुप माओवादीत जनयुद्ध यायेत ता:लात । ज्ञानेन्द्र थ:गु राजकीय सत्ताया उपभोग यायेखंगु जक मखु कि चुनाव व:गु कांग्रेस एमालेया सरकारत असक्षम व भ्रष्ट जुया राजनीतिप्रति हे वितृष्णा ब्वलन ।

खयतला संविधान जारी जूसां निसैं हे विशेष याना: संघीयता कार्यान्वयन मजुइगु अवस्था थ्यंकेत थीथी शक्तितसैं भूमिका म्हिताच्वंगु दु । संघीयता हे विरोध कमल थापा व चित्रबहादुर केसी विरोध यानाच्वंगु आवरण जक ख: जबकि संविधान हे संघीयता विरोधी जुइगु कथं च्याय हये धुंकल । संघीयताया ज्यान हे स्थाना: संघीयता सहितया संविधान जारी जुलधका: खुसी जुइमा:गु मदु । संघीयता कार्यान्वयन यायेगु ख:सा दकलय् न्हापां स्थानीय तहया मखु प्रादेशीक तहया चुनाव याकेमा:गु ख: तर थ्व संविधान यथास्थितिइ हे स्थानीय तहया चुनाव न्हापां जुल धा:सा मेगु प्रदेशया चुनाव मयासे संविधान जारी या:गु दलतसैं संसदया चुनाव निं याकी । प्रदेशया चुनाव मजूसे संसदया चुनाव जुइ धुंका: संघीयता विरोधी, गणतन्त्र विरोधी दलतय् गठबन्धन क्वातूका छगू इलय् एमालेया केपी ओली प्रधानमन्त्री जूबलय्था सत्तारुढ गठबन्धनया शक्ति बल्लाका संघीयता बर्खिलापय् खुल्लमखुल्ला पडयन्त्र याना: नेपालय् स्थानीय तह व केन्द्र जक दुगु केन्द्रीकृत शासन व्यवस्थायात सुदृढ याइ । थुकथं ग्रायण्ड डिजाइन निक्क:गु संविधान सभाया चुनावया लिच्व: लिपा हे शुरू जगु ख: ।

स्थानीय निकायया चुनाव मजुगुलिं विकास निर्माण ठप्प जुल, स्थानीय निकायया कर्मचारीत भ्रष्ट जुल उकिं स्थानीय चुनाव जुल धा:सा फुक्कफाक्क ठीक जुइ धका:जनताया मनय् ख:ला धइथे च्वंक तर्क संविधान जारी या:गु दलया नेतातसैं न्ववानाच्वंगु दु । तर चुनाव जुया निर्वाचित निकाय दयेवं हे विकास फटाफट जुइगु व भ्रष्टाचार मदइगु ख:सा आ: नं संसदय् निर्वाचित निकाय दु छु नेपा:या राजनीतिक व कर्मचारी ख्यलय् भ्रष्टाचार व्याप्त मदुला ?

नेपा:या आ: नं विश्वया दकलय् भ्रष्ट मुलकया लिष्टय् दु । संविधान जारी या:पिं दलया शीर्ष नेतातसैं पुलिसया आईजिपि नियुक्ति यायेत या:गु पडयन्त्र जक मखु कि न्यायधीश नियुक्ति, बोर्ड नियुक्तिनिसैं कया: संसदया चुनाव जुल धका: सत्तारुढ व प्रमुख विपक्षी दलयात नेतातसैं भ्रष्टाचार यायेगु दिक्क दुला ?



# नेवा: पत्रकारया स्वनिग: व काभ्रे कचा मुना किपुलिङ्ग क्वचाल चैत्र ४ गते बुदिं हनीगु, बैशाख ११ गते तक्या दुने जिल्लानिसें केन्द्रया तकं दमँज्या याइगु



ज्वजलपा वा:पौ /

नेवा:तय्गु राष्ट्रिय संगठन नेवा: पत्रकार राष्ट्रिय दबूया खसलाय् स्वनिग: व काभ्रे मुना ज्याभव: जूगु दु । किपूया नेपालभाषा एकेदमिङ्ग शनिवा: जूगु उगु मुँज्याय् दबूया यें जिल्लाया दांभरी मदुम्ह सानुकाजि महर्जनप्रति श्रद्धाञ्जली प्वकेगु ज्या जूगु ख: । छगू दशक न्हय:निसें पत्रकारीता खलल्य ज्या: यानादीम्ह मदुम्ह पत्रकार सानुकाजि महर्जनया किपातय् स्वांमा: क्वखायेका नापं स्वां देछाया नेवा: पत्रकारतयसं श्रद्धाञ्जली प्वकेगु ज्या या:गु ख: । पत्रकार महर्जनया छेंज:पिन्त ग्वाहालि यायेगु जुइ धका: नं यें जिल्ला कचापाखें जानकारी विउगु दु ।

उगु हे कथं आ: याकनं हे मदुम्ह सानुकाजि महर्जनया नामं

पत्रकारतय्गु दथुइ कासा यायेगु, वय्क:या लुमन्तिङ्ग विशेष ल्या: कथं नेवा: ज: पिकायेगु जुइ धका: नं यें जिल्लाया नाय: नातिकाजि महर्जनं जानकारी बियादीगु ख: । ज्याभवलय् पत्रकार महर्जनया योगदानयात कया चर्चा यानादीगु ख: । ज्याभवलय् नेवा: पत्रकार राष्ट्रिय दबूया केन्द्रीय नाय: श्रीकृष्णया अध्यक्षताय् जूगु भेलाय् स्वनिग:या जिल्ला नापं काभ्रे जिल्ला कचाया दुज:पिं नापं केन्द्रीय पार्षदपिं सहभागी जुयादीगु ख: । केन्द्रया थीथी कव:या बारे कव:या प्रमुखपिं प्रशिक्षण कव:या कजि नापं न्वकू सुरजवीर वज्राचार्य, अनुगमन कव:या प्रमुख नापं न्वकू नुपेन्द्रलाल श्रेष्ठ, आर्थिक कव:या कजि नापं दांभरी सुरेन्द्रभक्त श्रेष्ठ, मिसा कव:या कजि नापं

नवकू मिरा अमात्य, नीति तथा कार्यक्रम तर्जुमा कव:या कजि नापं मूछ्याञ्जे सुनिल महर्जन व समन्वय कव:या कजि नापं नाय: श्रीकृष्ण महर्जनं कव:या बारे न्ववानादीगु ख: । केन्द्रीय दुज: विगेन तुलाधरं न्ह्याकादीगु उगु मुनाय् यें जिल्लाया नाय: नातिकाजि महर्जन, ख्वप कचाया नाय: इश्वरकाजी खाइजु व काभ्रे कचाया नाय: सिद्धिबहादुर कर्माचार्य थ:थ:पिनिगु जिल्ला कचाया बारे न्ववानादीगु ख: । अथे हे केन्द्रीय दुज: नविन जोशी, केन्द्रीय पार्षद रमा कर्णजीत लगायतयापिन्सं थ:थ:गु विचा: प्वकादीगु ख: । ज्याभवलय् केन्द्रीय दुज:पिं प्रज्वल श्रेष्ठ, नजरराम महर्जन, विजय कर्माचार्य, केन्द्रीय सल्लाहाकार विजयरत्न असंवरे



लगायतयापिं नं सहभागी जुयादीगु ख: । अथे हे सहलह लिपा वइगु चैत्र ४ गते नेवा: पत्रकार राष्ट्रिय दबूया बुदिं हनेगु, बैशाख ११ गते तक्या दुने जिल्ला व केन्द्रया दमँज्या

यायेगु नापंसत्यनारायण बहादुरयात नेपाल पत्रकार महासंघया संस्थापक नाय:या रुपय् स्थपित यायेगु नितिं मा:गु कथंया ज्याभव: न्ह्याका वनेगु बारे नाय: श्रीकृष्ण महर्जनं

जानकारी बियादीगु ख: । मुँज्याय् पत्रकार दबूया बारे व्यापक सहलह जूगु ख:सा अझ सशक्त कथं दबूयात न्हय:ने यंकेगु ज्या यायेमा: धका: सहभागीपिन्सं व: बियादीगु ख: ।

## किपूया ल्वहदेग:या द्य:या प्राणप्रतिष्ठा जुइगु

ज्वजलपा वा:पौ /

नेपाल संवत् ११३५ बछलाथ्व सप्तमी (वि.सं. २०७२ साल बैशाख १२ गते) व्व:गु त:भुखाचं शाक्यसिंह बुद्ध, प्रज्ञापारमिता व पद्ममपाणी लोकेश्वर बुद्ध धर्म संघ थापना यानात:गु किपूया ल्वहदेग:या नामं नांजा:गु देग: नं स्यन । थ्व हे खंयात वा:चायेका: जीर्णोद्धारया नितिं ज्याखँ न्ह्याकेत त्वा:या ल्वहदेग: ग्वाहालि पुच:पाखें जीर्णोद्धार या नितिं नेपाल सरकार, पुरातत्व विभागयात इनाप या:गु व पुरातत्व विभागया आर्थिक व प्राविधिक ग्वाहालिं ने.सं. ११३६ तछलागा चौथी (वि.सं. २०७३ साल असार १० गते) क्षमापूजा याना: जीर्णोद्धारया ज्या न्ह्याकल । न्याला व भिन्त्यानुयातक मदिक ज्या न्ह्याका: ने.सं. ११३७ थिलाथ्व एकादशि (वि.सं. २०७३ साल



मंसिर १९ गते) देग: जीर्णोद्धार या ज्या क्वचायेकल । आ: विधिवत रुपं ने.सं. ११३७ चिल्लाथ्व चौथी व पञ्चमी (वि.सं. २०७३ साल फागुण १९ व २० गते) निन्हुयंकं प्राण प्रतिस्था यायेगु साइत नं

क्व:जित । उकिं मन दुपिं सकलसितं उगु प्राण प्रतिस्था यायेगु (दशकर्म खंकेगु) ज्यासं पुजा तया: पुण्य संचय याना दिइत ल्वहं देग: संरक्षण ग्वाहालि पुच: नं सकलसितं इनाप या:गु दु ।

## नेपालभाषा क्लबया न्वचू कला तालिम उलेज्या

ज्वजलपा वा:पौ /

नेपालभाषा क्लब किपूया खसालय् जुइत्यंगु व्यक्तित्व विकासया नितिं 'न्वचू कला ( उद्घोषण तालिम)'या उलेज्या म्हिग: किपूया १७ वडा बाहिगामय् च्वंगु कीर्तिपुर मा.वि.स जूगु दु । नेपालभाषा क्लब किपूया नाय: रिदेन महर्जनया सभानायोसुइ जूगु उगु ज्याभव:या मूपाहा कीर्तिपुर नगरपालिकाया वरिष्ठ लेखा अधिकृत सानुबाबु परियार त्वा देवाय् मत च्याका उलेज्या यानादीगु ख: । उलेज्या ज्याभवलय् पाहाँ कथं नेपालभाषा केन्द्रीय विभागया प्रमुख प्रा.डा. चन्द्रमान वज्राचार्य, प्रा.डा. तुयूवहादुर महर्जन व संस्कृति अन्वेषक प्रयागमान प्रधान, नेवा: बस्ति नेवा: अभियानया कजि दिपक तुलाधर, नेपाल भाषा क्लब येंया नकिं मय्जु कमला मानन्धर, नेपाल भाषा क्लब यलया नकिं विना महर्जन,



देव आनन्द महर्जन लिसें भाय्थ्य:मिपिनिगु उपस्थिति दुगु ख: । ज्याभव:या कजि राजेन्द्र महर्जनं ज्याभव: न्ह्याकादीगु ख: । नुग: खँ प्वकेगु भवलय् मूपाहाँ सानुबाबु परियार जुं भाय् कला धैगु भीत म्हसीकेगु ख: न्हूगु संविधान जारी जुइधुंकल । ८०,००० जनसंख्या दुग उकिया उन्नतिया नितिं न्यागू स्कुलय् ४०,००० दां बियाच्चवनागु धका: नुग: खँ प्वकादील । ज्याभव:स नेपालभाषा ख्य:या साहित्यकारपिंलिसें भाय् थ्य:मिपिनिगु उपस्थिति दुगु ख: । उगु तालिम केके मानन्धर

बियादीगु जानकारी ग्वसा: खल: क्लबं ब्यूगु दु । ज्याभवलय् नेपाल भाषा क्लबया छ्यान्जे रुपा महर्जन लसकुस न्वचु तयादीगु ख: । अथेहे सभानायो रिदेन महर्जनं मां भाषा म्वाका वलंकेत वंगु बैशाख ज्यासना पुच नीस्वनागु धका: नुग: खँ प्वका ज्याभव: क्वचायेकादील । थुगु तालिम ज्याभव: थौं निसें की.मा.विया हलय् बान्धि ४-६ ता: ई तक न्ह्याइगु जुल । ज्याभव: नेवा: पत्रकार दबूया छ्यान्जे के.के. मानन्धरं कक्षा संचालन याइगु जुलसा थीथी पत्रकाररिता ख्य:या शिक्षकपिन्सं कक्षा काइगु ज्याभव: दु ।



## सडक विस्तार पिडितपिनिगु धर्ना माइतीघर मण्डलाय्

अदालतया आदेश नं सरकारं पालना मयाइगु जूसा न्याय नं अनिश्चित सरह जूगु दु। थुज्वःगु अवस्थाय् जनतां थःम्हेस्यां हे सुरक्षा थःम्हं हे यायेगु खः।

काठमाडौं उपत्यकाव्यापी सडक विस्तार पिडित संघर्ष समितिया ग्वसालय् थौं विहिवाः येंया माइतीघरय् च्वंगु मण्डलाय् धर्ना च्वंगु दु। उगु धर्ना व्वति काःपिन्सं माइतीघर मण्डलानिसें जुलुस न्ह्याकाः ववर महलतक थ्यंकूगु खःसा हाकनं अनं लिहां वयाः माइतीघर मण्डलाय् धर्ना च्वनेगुयात निरन्तरता ब्यूगु खः। सडक विस्तारया विरोधय् सडक विस्तार बन्द याः धैगु सः थ्ययेकाः याःगु उगु धर्ना ज्याभवलय् सडक विस्तार पिडित सरोकारवालापिलिसें नेवाः न्ह्यलुवाः व कार्यकर्तापिनिगु उपस्थिति दूगु खः। उगु धर्ना ज्याभवलय् काठमाडौं उपत्यकाव्यापी सडक विस्तार पिडित संघर्ष समितिं छगू पर्चा नं सार्वजनिक याःगु खः। उगु पर्चाय् 'सडक विस्तारया नामय् राज्य अराजकतापाखे' शीर्षक बियाः थीथी खँत न्ह्यथनातःगु दु। विगत छुं महिनासिं सरकारं गैरन्यायिक सडक विस्तार विरुद्ध स्विनिगःलगायत देय्या थीथी थासय् सकल सडक विस्तार पिडितपिं छथी छप्पं जुयाः आन्दोलन यानाच्वंगु खँ न्ह्यथंसें पिडितपिन्त सहमतिइ हयाः छें जग्गाया पर्याप्त व चलनचल्तीया बजाः मूल्य कथंया क्षतिपूर्ति व मुआब्जा बियाः जक सडक विस्तार जुइमाःगुलि सर कारं क्षतिपूर्ति व मुआब्जा छुं आधार तय मयाःसे अदालतया अन्तरिम आदेशया तर्क पालना मयाःसे छुं दि न्ह्यःनिसें लाक्वपाक्व डोजर आतंक ब्वलंकूसें सडक विस्तार ज्या यानाच्वंगु खँ न्ह्यथनातःगु दु।

सडक पिडितपिनिगु पक्षय् न्वःवानाः वयाच्वंगु व संघर्ष यानाः वयाच्वंगु आदिवासी जनजाति कानुनविदपिनिगु संगठन 'लाहुनिप' या छयाञ्जे अधिवक्ता शंकर लिम्बुं जनचेतना ब्वलंकीगु हेतु व सरकारयात खबरदारी यायेगु आजुं राज्यं सडक विस्तार यायेबलय् छयलेमाःगु कानुनी खँत सडक पिडितपिनिगु न्ह्यःने हःगु दु। थुकियात अध्ययन यानाः सडक विस्तार पिडितपिं थःगु अधिकारप्रति सजग व सचेत जुइनु धैगु इनाप नं उगु पर्चाय् यानातःगु दु।

राज्यं सडक विस्तार यायेबलय् थुगु कानुनी खँ याये हे माःगु कानुनय् च्वयातःगु दु :

संविधान व कानुनय् जनताया सम्पत्ति प्राप्त यायेन्ह्यः कायेत पायिछ, जू कि मजू अध्ययन यायेगु। पिडितपिन्त वया छें जग्गा छाय् अधिकरण याये पायिछ, मजू उजुर यायेगु सुचं व ई बिइमाः। घरबास दूगु खःसा अधिकरण याये पायिछ, मजू। मेमेगु विकल्प मालेबलय् नं मलूसा अपवादया रुपं घरबास लाःसा न्हापां मेथाय् वयात घरबास उपलब्ध याकेमाः। घरजग्गाया चलनचल्तीया मुआब्जा व क्षतिपूर्ति बिइमाः। घर बासपाखें उठिबास याःगु हुनिं जुइगु समस्याया निराकरण यायेत पुनःस्थापनाया व्यवस्था यायेमाः। सांस्कृतिक धरोहर, सम्पदा, धार्मिकस्थल, सार्वजनिक सम्पत्ति ल्यंकातयेत अध्ययन यानाः योजना हयेमाः। सडक विस्तार या नामय् सयौं सम्पदा, देगः, चैत्य गुगु ढलंढः दैं पुलांगुयात नं तहसनहस यायेत्यंगु दु। स्विनिगःया सभ्यता तहसनहस यायेत स्वायच्वंगु दु। राज्यं जनताया जीउघन सुरक्षा यायेमाः। तर अत्याख पिडितपिं छें दुनीगु ग्याःचिक्कुं मानसिक तनाव हे तनावय् म्वायेत बाध्य जुयाच्वंगु दु। छें थुंगु पीरं आत्महत्या तर्क याःगु जानकार िइ वःगु दु। सशस्त्र प्रहरी छयलाः जनताया छेंय् बुल्डोजर छयलेत्यंगु दु।

स्विनिगः नेवाःतय्गु आदिभूमि जूगुलिं थनया विकासय् प्रभावित नेवाः व मेमेगु प्रभाविततय्गु सहभागिता व मञ्जुरी कायेमाः, अन्तराष्ट्रिय मानवअधिकार अनुरूप थ्व ज्या ज्याःगु मदु। जातिय ल्याखं ९० प्रतिशत नेवाःतय्गु व १० प्रतिशत गैरनेवातय्गु छें थुंगु दु व थुनेत्यंगु दु। परिणामयात स्वयेगु खःसा अन्तराष्ट्रिय



कानुन कथं थ्व जातिय विभेद व विकासया नामय् जातिय संहार खः। छायाःसा बास गाँस खोसे यायेगु धैगु म्वाः म्वाकं स्यायेगु थें हे खः। राज्यं बृद्धबृद्धा व मचाखाचातय् विशेष संरक्षण यायेमाः। तर उखेपाखे छुं ज्या मयाःसे ५०,००० म्हं मल्याक्क बृद्धबृद्धा व मचाखाचापिन्त बेघर व बेसहारा यानाः बिचल्लि यायेत्यंगु दु। सवोच्च अदालतया आदेश कार्यान्वयन यायेगु व याकेगु दायित्व राज्यया खः तर अदालतं छें थुनेगु ज्या दिकेत अन्तरिम आदेश जारी याःगु जूसां नं डोजर चलेयानाच्वंगु दु। महिनाय् ३० औं हजार गाडी दुकायेगु, दूगु सडक मर्मत मयाइगु, निर्माणया नामय् जूगु सडकया दुर्दशा यायेगु, ट्राफिक व्यवस्थापन मयाःसे सडक जक तब्या यायेगु ज्यां ट्राफिक जाम समस्या समाधान जुइमखु। विश्वया अध्ययनं सडक विस्तार ट्राफिक जाम समस्याया समाधान मखू धाःगु दु। तर सरकारं उखेपाखे ध्यान ब्यूगु मदु। अत्याधिक सवारी साधनया प्रदुषणं जलास्थं, क्यान्सर व मानसिक त्वरिगपिनिगु चाप अस्पतालय् न्हियान्हिथं अप्वयाच्वंगु दु। सरकारं उखे ध्यान ब्यूगु मदु। सडक मुद्दाया लिखित लिसलय् सरकारं विरामीपिन्त लेंपु जामया हुनिं इलय् अस्पताल थ्यंके मफूगुलिं लेंपुइ हे मृत्यु जुइगु जुयाच्वंगु खँ न्ह्यथंगु दु। तर स्विनिगः पिने अस्पताल चायेकाः अनया जनताया स्वास्थ्यया अधिकार सुनिश्चित मयाःसे फुक्क अस्पताल स्विनिगलय् केन्द्रीत यायेगु नियत सरकारय् च्वनीपिनिगु दु, छाया धाःसा अधिकांश निजी अस्पताल व नर्सिङ होमय्के इमिगु लगानी दु व विरामीपिन्त सेवा मखु व्यापार यायेगु नियतं ज्या जुयाच्वंगु दु। स्विनिगः पिने लेंपु दयेकेत अति आवश्यक थाय्त दु। तर अनावश्यक सडक विस्तार यानाः बजेट दुरुपयोग यासें स्विनिगः पिनेया जनताया विकासया अधिकार कुण्ठित याःगु दु।

च्वय् न्ह्यथनातःगु कानुनी खँ अवलम्बन हे मयाःसे सरकार थःम्हेस्यां हे कानूनया पालना मयाःगु अवस्था दु। थुगु कानूनतसैं जनताया जीउघनया सुरक्षा मयाइगु जुइधुंकाः कानूनया औचित्यय् न्ह्यसः चिं दंवःगु दु। अदालतया आदेश नं सरकारं पालना मयाइगु जूसा न्याय नं अनिश्चित सरह जूगु दु। थुज्वःगु अवस्थाय् जनतां थःम्हेस्यां हे सुरक्षा थःम्हं हे यायेगु खः। संसारया जनता बाहेक फुक्क अस्थायी विषयवस्तु खः। गथेकि कानून, व्यवस्था, शासन, राजनीति, सरकार व शासक। थुपिं अदलबदल जुयातुं च्वनी। तर जनता दयातुं च्वनी। आः अस्थायी खँ हिलेगु पाखे केन्द्रीत जुइगु कि, सुकुम्बासी जुइगु, आत्मनिर्णयया अधिकार छयलेनु धकाः काठमाडौं उपत्यकाव्यापी सडक विस्तार पिडित संघर्ष समितिं सार्वजनिक याःगु पर्चाय् थुगु खँ न्ह्यथनातःगु दु।

## हलिं नेवाः गुथि जल कचा नीस्वन

हलिं नेवाः गुथि यल हलिं नेवाः गुथि जल (हरिसिद्धि) कचा थौं ने.सं. ११३७ सिल्लागा दसमि (फागुन १० गते) मंगलवाः छगू ज्याभवःया दथुइ नीस्वंगु दु।

गुथिया मूनायः शान्तप्रकाश श्रेष्ठया मूपाहांसुइ न्ह्याःगु उगु जल कचा नीस्वना ज्याभवः यलया हरिसिद्धि सामुदायिक भवनय् जूगु खः। चैनगोपाल महर्जनया नायःसुइ न्ह्याःगु उगु जल कचा नीस्वने ज्याभवलय् गुथिपाखें निर्वाचन ज्याभवः नं न्ह्याकूगु खः। निर्वाचन अधिकृत गुथिया मू दांभरि दीपा महर्जनपाखें निर्वाचन जूगु खः। निर्वाचनपाखें केन्द्रीय दुजः राजेन्द्र कुमार महर्जन ल्यःगु खःसा जल कचाया नायः अकल बहादुर महर्जनयात ल्यःगु खः। अथेहे, छयाञ्जेय् बेखाराम महर्जन व दांभरि रामगोपाल महर्जनयात ल्ययाः छगू ज्यासना पुचः नीस्वंगु खः। ज्याभवलय् प्रतिनिधि कथं नगेन्द्र महर्जन व




दुर्गाबहादुर महर्जनयात ल्यःगु खः। हलिं नेवाः गुथि जल कचाया ल्यःपिं पदाधिकारीपिन्त गुथिया केन्द्रीय दुजः रिजु श्रेष्ठं सपथ नकादीगु खः।



पांगाया विष्णुदेवी  
बालकुमारी जात्रा

बजारय् वये धुंकूगु दु  
थःगु प्रति सुरक्षित यानादिसँ

स्वापू नितिं मेमेगु फोन नम्बरः ४३३४०१३,  
९८४१७५२५८३, ९८४६०४६१२३९



बखुमदः जात्रा  
न्हय्गां जात्रा

## साहित्य उपन्यास – जन्ति न्ह्यात

चमि- मदन गोपाल प्रधान  
“क्वाःघासा”

१

कथंहे.....

स्वः स्वः थाय् खसु जक । खसुं नं श्रीयात ही मी हे चायेकल । मन ही मी चाःसां बाजया मिखां स्वये थें स्वयाः च्वन, गनं खसु पाँय् मदु थासं मां देया दर्शन देला धकाः । खसु पाँय्या दुने दुने च्वयाः घुसुनं न्ह्यानां च्वंगु व फय्खः मानो यानय्हे थानाः च्वंगुला धयाथें वं तायेकल । खजा थय् तायेकेगु पिच्याः मनय् लुया वैगु भ्रमजक खः । फय्खः न्ह्याना च्वंगु दु धयागु खँ वं मस्यूगु नं मखु ।

“छिगु छें नेपालय् गन ?” फ्रेन्च भाजु श्रीयाके न्यन ।

“किपुलिइ ।”

किपूया नां कायेवं व फ्रेन्च भाजुं छुं ल्वःमंगु लुमंकेत कृतः याये थें विचाःयात । वया कलापाखे स्वया खासाखसुं खँ ल्हात । अले श्रीपाखे स्वयाः न्हिलाः धाल, “किपुमितय् न्ह्याय् मदु धाःगु खँय् छिगु छु विचाः ?”

“थ्व खँ गथे धाःसा नेपोलियनया न्ह्याय् मदु धाये थें खः ।” न्हिलान्तु श्रीधाल ।

श्रीया खँ न्यनाः फ्रेन्च भाजु वातां च्वन, छु धाःगु थ्व धयाथें मतिइ लुइका । सायद नेपोलियनया न्ह्याय् गथे जुया मदु धाःगु जुइ धकाः विचाः याःगु जुइमाः । नेपोलियनथें ज्याःम्ह अद्वितीय मनूया छाइसे च्वंगु न्ह्याय् दु धयागु न्ह्याम्हसेनं स्यूगु खँ खः । तर श्री थथे छाया धाःगु जुइ धकाः थथे अथे छुं हे धायेमफुगुलिं व टुरिस्ट भाजुं थः कलाः पाखे स्वत । भातं थःत स्वःगु अर्थ थुइकाः व फ्रेन्च मय्जुं धाल, “नेपोलियनया छाइसे च्वंगु न्ह्याय् दु धयागु छि मस्यूला ?”

जिगु नं ला न्ह्याय् छाइसे हे च्वं नि । छिगु हे न्ह्यनेसं दुगु खँ खः ।” श्री लिसः विल ।

निम्ह तिपुनं वं वयागु वं वयागु ख्वाः स्वत । खँ ला मखुगु मखु धयाथें निम्हेसियां

मनय् वन । तर इतिहास कथं धयाः तःगु धयागु खँ लुमंकाः व फ्रेन्च भाजुं थःगु छाति छकः तिप्यंकाः धाल, “छिगु न्ह्याय् दःसां छिकपिनि घाँय् घाँय् आजुपिनिगु न्ह्याय् थौया निसः व नीन्यादं न्ह्यः हे चाना छवये धुंकल नि । ल्वःमन ला कि छु ?”

“लुमंगुलिं हे ला नेपोलियनया न्ह्याय् मन्त धाये थें हे जक खः धयागु ।” श्री धाल ।

“नेपोलियनया न्ह्याय् सुनां चाःगु दु ?”

फ्रेन्च मय्जुं न्यन ।

“जिमि घ्वाँय घ्वाँय आजुपिनिगु न्ह्याय् नं सुनां चाःगु दु ?” श्री नं न्यन ।

“पृथ्वीनारायण शाह नं का ।” फ्रेन्च मय्जुं श्रीया म्हुतुप्वाः तिके भनं धाल ।

“अथेला नेपोलियनया न्ह्याय् नं इ.सं. १८१५ सं वाटर्लूलय् बोनापर्टया विरुद्धये ल्वाःपिं सिपाई तयसं चाना विल नि ।” श्री नं धाल ।

“नेपोलियनया न्ह्याय् सुनानं गबलें हे चाःगु मदु । छिं छु धयादियागु ?” फ्रेन्च भाजु धाल ।

“अथे हे ला जिनं धयाच्वनागु । जिमि घ्वाँय घ्वाँय आजुपिनिगु न्ह्याय् नं चाःगु मदु ।” श्री ध्वाः थुइके थें याना धाल ।

“अय्सा इतिहासय् च्वयातःगु खँ सत्य मखु ? थौं तक सकसिनं सत्य धकाः भाःपाः तया च्वंगु खँ आः वयाः छिगु लागि गथे जुयाः असत्य जुल ?” भाजु फ्रेन्च न्यन ।

“मिसातय् सिवेनं मिजंतय् वा अप्ठः दै । उत्तररिखे फय् न्ह्याना च्वनि वलय पुसा तल धाःसा काय्मचा हे बुइ । आदि आदि अरप्टुं थें ज्याम्हं धयाःतःगु धापूत मिलय् मजू धकाः धाःम्ह लर्ड बटूण्ड रस्सेलया खँय् छिगु असहमति ला दइमखु जुइ माः । अरप्टु थें ज्याःम्ह तः जिम्ह विद्वानया धापू असत्य जुइ मखु धकाः मनय् तायेकाः च्वपिं मनूतय्त भाजु रस्सेलं थ्व खँ ध्वाथुइका विल कि छुं नं खँ विचाः मयासे मिखा तिसिना खः धकाः नालेगु अथवा धायेगु मुखता जुइ फु । छुं खँ खः मखु धाये न्ह्यः भीसं भीगु बुद्धि विवेक छेले सयेके माः । भीतः नं चवं बुद्धि विवेक व शक्ति वियातःगु दु । अय्जूगुलिं इतिहासय् धयाः तःगु गुलित पाय्छि जू धकाः क्वछिइत वास्तविक लिधंसा मालाः केलाः विचाः शक्तिया ताल्जुइ तया लनां स्वयेगु हे दकसिवें वांलागु ज्या जुइ ।” श्री धाल ।

हलिं नेवाः गुथि किपू कचां किपुली याःगु

“भिके-ल्ट्वने-न्हूधाः यायेनु”छ्यों तया चिनाखँ गोप्ठी ब्वंगु चिनाखँ छसिंकथं

पिकया वनेगु तातुना थ्व चिनाखँ न्ह्यब्वयागु खः

## ४.थःथिति म्हसीकातल

रमेश मान महर्जन

पाँगा, किपू

नखः वल, चखः वल

नल त्वन दुनुगःया खँ तल

सु वल सु वन

छु नल छु त्वन ।

छेंय् वयाः लःजक त्वंसां

सकले खुसी जुइगु जुल

ला व लापी नये दःसां

थः मदुपिनिगु नुगः ख्वल

भ्वय् धइगु भ्वय् हे खः

ल्वय् हे न्हनावनी उकिं

लं भ्वाथः सुना खनी

सुना सुयात कनी

जात्रा धाल मोहनी, स्वन्ति धाल

नेवाः संस्कृति म्हसीकातल

नेवाः(नेवाः छ्वाः जुयाः

नखः हनेगु वालः, काल बिल

धाः धिमे खिं थाकाः

नाय्खिं बाजा काहाँ पुइकाः

थाय् थासय् हुलाप्याखं हुइकाः

गुलि न्ह्याइपुक देखः ल्हों(ल्हों ब्वाकातल

बाह्र वर्ष बाह्र महिना

बाह्र वर्ष हे मेला

नखः चखः हनाच्वँतले

याइमखु सुनां सुयात हेला

थ्वहे खः भी नेवाःया गौरव

मखु भीपि पाण्डव व कौरव

संस्कृतिया धनी भीपिं

दक्क संस्कारया मुकं दु अनुभव दुपिं

ला व लुसिथें मिले जुयाः

गुथिगाना चले यानाच्वपिं

थकालि न्वकू स्वकू हनाः

विधि विधान मानेयाना च्वपिं

थःथिति हे थःगु सम्पत्ति

विश्वासया भरे म्वानाच्वपिं

थःगु तुतिं थः हे चुइमाः धकाः

थःगु इज्जत तयाच्वपिं

मांबौ व आजु अजि धकाः

थ्व दाजु किजा तता केहे धकाः

जि काय् म्थ्याय् छय् छुइ धकाः

भी सकसितं म्हसीकातल

ई छुकाः, बाह्राः तयाः

वियाछ्ववयाः दमह्राः यानाः

काय्ता(पुजाधुंकाः बिहा यानाः

ता ईतक म्वायेमा धकाः जंकु याकातल

जाति धर्म भाषा संस्कृतिया

च्वजाःपिं खः भी नेवाः

तःमि चीमिं थजाः क्वजाः

भेद मदु भीके भी नेवाः

बूसां माः भी सीसां माः

मदयेक मगाः व स्वांमाः

खेपी चेपी ला व लापी

ल्वसा(घासा सकतां माः

तपाईको टोलमा भएका घटना कीर्तिपुरको समाचार बनाउने  
हो भने तपाई एक कल फोन गर्नुस् हामी तपाईको टोलको  
समाचार कीर्तिपुरको समाचार बनाईदिनेछौं

## कीर्तिपुर सन्देश साप्ताहिक



कीर्तिपुरको चित्रण

किपुलिं पिदनाच्वंगु कीर्तिपुर सन्देश वाःपौ व ज्वज्वलपाः वाःपौया ग्राहक जुइगु नितिं स्वापू तयादिसँ

कार्यालयः निखासी टोलः कीर्तिपुर नपा-३  
फोन नं.: ४३३३००७, ९८४९४०९०७७

ज्वजलपा वाःपतिइ छिगू चिनाखँ/बाखँ/हाइकू विज्ञापन  
व मेमेगु च्वसू पिथनेगु जूसा जिमित स्वापू तयादिसँ

सकलसिगु मंकाः सः



ज्ञाजलपा वाःपौ

ज्याकूः निखासी त्वाः किपू नपा-३ फोन ल्याः ४३३३००७,  
९८०८६२६४२० ई-मेल : kirtipur\_sandesh@live.com



## चिनाखँ



**नाति महर्जन**

**व:चपा, पांगा**

नेपा:या थौकन्हेया गणतन्त्र स्वयंबले  
गरिब जनता हेकेगु मन्त्र थें च्वं  
गणतन्त्र देशया नेतातयगु चलखेल स्वयंबले  
देश लुटे यायगु पदयन्त्र थें च्वं

संसद भवने नेता वैगु स्वयंबले  
गुलिं देश विकासया ज्याय व:पिं थें च्वं  
सभा सिमधवं फाटफुट पिहांवनीगु स्वयंबले  
जू म्हिता त्याका: बुका:व:पिं बान्हमासे थें च्वं  
प्याजेरोय च्वना संसद भवने वडगु स्वयंबले  
थ: थें हे देश सिङ्गापुर यायत व:पिं थें च्वं  
सभामुखया भाषण मन्यसैं न्ह्य:वयकीगु स्वयंबले  
धाथें भत्ता क पचे या:व:पिं थें च्वं ।

थौकन्हे संसद भवने दुनेया गतिविधि स्वयंबले  
खालि मचात म्हितकेगु रंगशाला थें च्वं  
पक्ष विपक्ष ल्वाना हाला जुडगु स्वयंबले  
पहलमान ल्वाइगु अखडा थें च्वं ॥

सभामुख न्ह्योने भाषण याइगु स्वयंबले  
धाथें हे इमान्दार देश प्रेमिन् थें च्वं  
कालोबजारी भ्रष्टाचारीत नाप त्वाय्चिनात:गु स्वयंबले  
देश मिया नइपिं दलालत थें च्वं ॥

दौरा सुरुवाल फिना संसद भवन वैगु स्वयंबले  
भद्र भलादमि विद्वान थें च्वं  
संसद भवनय मेचं कयका ल्वाइगु स्वयंबले  
मुलुकय मद्रुपिं डाँका ज्यानमारा थें च्वं  
प्रजातन्त्र व:गु थुलिमछि दत न देशय छुं ज्या मयागु स्वयंबले  
धाथें थुपिं देशद्रोहीत थें च्वं  
हानं इमि निम्ह प्यम्हजक पालंपा: प्रधानमन्त्री जुडगु स्वयंबले  
थ्व देश हे इमि मापिन्सं ज्वनाव:गु दाइजो थें च्वं ॥

इमिसं लँ त:बाला यायेत छें थुना ह:गु स्वयंबले  
नेपा: दे याकनं स्वर्ग यायेत्यंगु थें च्वं  
हिउँद, वर्षा जनतायात धुल्य ध्याचलय न्यासिकात:गु स्वयंबले  
जनतायात कायल याना देश पितना छोयत्यंगु थें च्वं  
गामे नं बुँ दथुं दथुं लँ दयका ह:गु स्वयंबले  
ज्यापुतसैं बुँ ज्याना नय्मवाल धा:गु थें च्वं ।  
मुआब्जा मब्यूसे छें बुँद दोजर चलेया:गु स्वयंबले  
नेपालं नेवा:त पितना छोयत्यंगु थें च्वं  
यें, यल, खपय छें थुना ह:गु धा:स्वयंबले  
८५% नेवातेगु हे ला: व धा:थें च्वं  
आ: फाष्टट्याक व रिङ्गरोड दयका है धा: थें च्वं  
९०% ज्यापुतेगु बुँ दथुं दयका है धा: थें च्वं ॥  
नेवातयगु नेपा:मण्डल धा:गु थ्व राजधानी स्वयंबले  
लँ व छें जक जायके त्यंगु थें च्वं

भी आदिवासीया छें बुँद दोजर जोते याना जिं स्वयंबले  
न्हून्हुगु छें दना वहे भ्रष्टाचारी, कालोबजारीत तयेत्यंगु थें च्वं  
नेतातयगु थज:गु चलखेल स्वयंबले  
छें बुँ ला:पिनि आन्दोलनय ग्वाहालि वने मा:थें च्वं  
नेपा:मि भी सकलें छप्पं जुया जिं स्वयंबले  
वहे छें थुना च्वंगु दोजर हाकिम, नेता या छें ल्वाके यने मा:थें च्वं  
इमिसं नेवा:तयत दु:ख स्वयंबले  
याकनं नेवा:त छप्पं जुया दने माल थें च्वं  
पुलिस न्ह्योने तया छें थुना ह:गु स्वयंबले  
हानं छक: हतियार ल्त्वने माल थें च्वं ॥  
नेवा:त सिधा सोभा धका इमिसं स्वयंबले  
हेपे याना बुलदोजर चले याका तया थें च्वं  
नेवा: हे नेपा:या शक्ति ख: धैगु जिं स्वयंबले  
आतक इमिसं थुइके मफुनि थें च्वं

**छिगू नं चिनाखँ, बाखनिसैं छुं नं  
कथंया च्वसू दुसा बियादिसैं जिमिसं  
ल्व:कंहवा:गु ज्वजलपा वा:पतिइ  
पिकायेगु जुइ ।**



**ज्याकू: निखासी त्वा: किपू नपा-३  
फोन ल्या: ४३३३००७, ९८४१४०१०७७  
ई-मेल : kirtipur\_sandesh@live.com**

## जनकवि दुर्गालाल श्रेष्ठ राष्ट्रिय बालसाहित्य पुरस्कार ल:ल्हात



जनकवि दुर्गालाल श्रेष्ठया नामं निस्वनात:ग जनकवि दुर्गालाल श्रेष्ठ राष्ट्रिय बालसाहित्य पुरस्कार  
थौं छगू ज्याभवया दथुइ ल: ल्हागु दु ।

प्रज्ञा भवनया प्रवचन हलय जुगु उगु ज्याभवलय नेपालभाषा एकेडमिया चान्सलर भाजु चितरजन  
नेपाली मू पाहाँ कथं भायादिगु ख: । बालसाहित्य पुरस्कार बालसाहित्य पुरस्कार बालसाहित्यकार  
कल्पना प्रधान व डा. कविताराम श्रेष्ठयात भिद्व तकाया लिसैं हना पौं देछा:गु ख: । उगु ज्याभवलय  
जनकवि दुर्गालाल श्रेष्ठया साहित्यिक यात्रायात कया: नेवा:न्हलुवा मल्ल के. सुन्दर वयक:या साहित्यिक  
योगदान यात कया: चर्चा यानादिल । अथे हे नेपालभाषा टाइम्सया सम्पादक साहित्यकार सुरेश  
मानन्धर पुरस्कृत बालसाहित्यकार कल्पना प्रधान व डा. कविताराम श्रेष्ठया साहित्यिक योगदान यात  
कया: जानकारी वियादिगु ख: । ज्याभवलय १२७ हस्ताक्षर तांया सफू बिमोचनया लिसैं बाल प्रतिभा  
सांस्कृतिक वज्या नं या:गु ख: । ज्याभवलय लसकुश जनकवि श्रेष्ठ च्वयादिगु सयथरी बाजा एउटै  
ताल ... म्ये छम्ह मचा पाखें बासुरी पुया: न्यंका या:गु ख: । याभव: साहित्यकार शशीकला मानन्धर  
न्ह्याकादिगु ख: ।

## नेवा: मिसा दबूया राष्ट्रिय अधिवेशन जुडगु

नेवा: मिसा दबूया राष्ट्रिय अधिवेशन फागुन १६ गते सोमवा: न्ह्याइगु जूगु दु । उगु अधिवेशन यँया  
प्याफलय च्वंगु द्वारिका होटलय सुर्थासिया ९ ता इलय न्ह्याइगु जानकारी ग्वसा:खलकं ब्यूगु दु ।  
नेवा: मिसातयत संगठित यायेगु व नेतृत्व विकास यायेगु तातुनां नेवातयगु राष्ट्रिय संगठन नेवा:  
देय दबूया विषयगत संगठन कथं 'नेवा: मिसा दबू' केन्द्रिय तदर्थ समिति थ्वहे ने.स. ११३७ कछला ६  
(कार्तिक २१, २०७३) खुन्हु नीस्वंगु ख: । केन्द्रिय समिति नीस्वनेधुंका: आ:तक्क १२ गू जिल्लाय जिल्ला  
समितित नीस्वने धुंकागु व मेमेगु जिल्ला समिति, नगर-गाउँ समिति नीस्वनेधुंकागु दु । आ: जुडगु  
अधिवेशनय नेवा: देय दबूया जिल्ला समितित दूगु नेपा:या ६७ जिल्लां मध्ये यक्व नेवा: मिसातयगु  
प्रतिनिधित्व जुडगु नं जानकारी नेवा: मिसा दबुलिं ब्यूगु दु ।

## WANTED

- |                            |              |
|----------------------------|--------------|
| 1. Skilled Welder (Arc)    | = 15 Persons |
| 2. Skilled Plumber         | = 30 Persons |
| 3. Skilled Mason           | = 5 Persons  |
| 3. Genaral Worker (Helper) | = 50 Persons |

Contact :

**Microtech m & e pvt. Ltd.**  
**00977-1-4000508**

**Work Station -Kathmandu**  
**Salary of Skilled Person**

**Starting from 500/ Per Day**

**Other facilities - As Per duty and hardworking**  
**Mail Id : mande@mos.com.np**